




Yebo na vatswari va yena a va tshama enhoveni.

Eka ndhawu yaleyo, a ku tshama Vhimbamukwama wa xihontlovila.


Vhimbamukwama a dumile hi ku dya swihlangi.



Sikwebu, tatana wa Yebo a ri muhloti. Loko a vuya ekaya, a huwelela a ku, "Yebo! Yebo! Tana u ndzi hlanganisa n'wananga."

Yebo a ta ku eka mana wa yena, "Tatana wa ndzi vitana. Ndzi fanele ndzi ya n'wi hlanganisa."

Vhimbamukwama u swi vonile leswi hinkwaswo.



Vhimbamukwama u ringetile ku encisela Sikwebu,
"Yebo! Yebo! Tana u ndzi hlanganisa n'wananga."
A swi tiva ku ri a nga twali ku fana na Sikwebu.
"Xana ndzi nga cinca njhani rito ra mina?" a tivutisa.



Vhimbamukwama u yile a ya lava ku pfuniwa eka xingomatanda.

"Xana ndzi nga cinca njhani rito ra mina ri fana ni ra vanhu?" a vutisa.


"Hisa xihloka ku fikela xi tshwukuluka, kutani u xi mita hinkwaxo," ku tsundzuxa xingomatanda.



Vhimbamukwama u yile ekaya a mita xihloka xo hisa.

Kutani a huwelela, "Yebo! Yebo! Tana u ndzi hlanganisa n'wananga."


E-e! Rito ra yena a ri nga fani na ra Sikwebu. A ri bonga.



Vhimbamukwama a nga tsakangi kutani a tlhelela eka xingomatanda.

"Xana ndzi nga endla yini ku kuma rito ro lala, ro fana ni ra vanhu?" a vutisa.

"Sweswi, hisa xihloka vusiku hinkwabyo kutani na mixo, u xi mita hinkwaxo," ku hlamula xingomatanda.




Endzhaku ka loko a endlile leswi a byeriweke,
Vhimbamukwama u yile a ya huwelela, "Yebo! Yebo! Tana u
ndzi hlanganisa n'wananga."

Rito ra yena a ri fana ni ra Sikwebu.

Yebo u tsutsumerile ehandle.

Kambe a ku nga ri tatana wa yena.



U lemuke xihoxo xa yena nkarhi wu fambile!

U ringetile ku tlhelela endzeni, kambe

Vhimbamukwama a n'wi khomile.


U rhwarile Yebo ku fana na xigodo a famba na yena endzeni
ka nhova.



Ku nga si hela nkarhi, Sikwebu u fikile a huwelela, "Yebo! Yebo! Tana u ndzi hlanganisa n'wananga."

Kambe Yebo a nga fikangi. Manana wa yena a hlamula, "U n'wi huwelerile khale."

Va lemukile leswaku n'wana wa vona u tekiwile hi Vhimbamukwama.



Sikwebu u tekile nhonga ya yena yo hlota kutani a ya enhoveni ku ya lava jaha ra yena.


Hi le kulenyana u vonile u a pavalarile eribuweni ra nambu.
A ri na nkwama wukulu ekusuhi na yena.



Sikwebu nyandlamerile ekusuhi na Vhimbamukwama. Loko a ri ekusuhi, u jikijekele nhonga liya a ba Vhimbamukwama.

Vhimbamukwama u tlurile kusuka evurhongweni a baleka.

Sikwebu u chuchile nkwama a humesa jaha ra yena.



Sikwebu u vukarhile jaha ra yena. A tsakile ku va a vuyelelanile na yena. Yebo a tsakile ku vona tatana wa yena.

Va rivarile hi Vhimbamukwama kutani va tlhelela ekaya.